

hat mit hochgelerten doctoribus, den er sunderlichen solt gybt, die bij yeren eyden stediges müssen eynem iglichen rechtes helfen widder eynen yglichen, wie grosses wesens ader stats er sij, da von vil zu schriben were. Auch so hat er reformeret und gerechtfertiget yn synem lande eynes yglichen states und wesens beyde geystlich und werntlichen von dem obersten bis zu dem niddersten, da eyn gross latines buch von gemacht ist, das konnig Albrecht, dem got gnedig sy, zu dutsche wolte lassen setzen'.

Auf einen nochmaligen Appell an die weltlichen Reichsfürsten folgt dann das eigentliche Reichsreformprojekt.

'Auch sol das Romsche rych zu stat wydder kommen, So ist zu dem ersten noit, das der Romsche konnig zu dem ersten eynen gemeynen frydden begryffe uber dutsche lant, Also konnig Rudolffe zu Wirtzburg det, da er erste konnig wart, dar von konnig Fryderich nu Romsch konnig kommen ist, der gar eyn frommer konnig was und vil vesten yn Doringen nidder warffe, als er zu Erforte eyn groisse Concilium hatte aller fursten dutsches landes und den konnig von Beheym. Czu dem anderen mael ist noit, das der konnig bestelle eyne stede gericht uf eyner stat steticklichen zu bliben, der konnig sy wo er sy, da man das gerecht wisse zu fynden, also zu Paryss stede ist das gerechte des Riches zu Franckrich, da sich der konnig nicht mit bekommert dan wan die sach gross fursten an ruret, so das er dan alleyne geynwirtig ist, des gliches ist das gericht uber Engellant stede zu Lunden, des glichen auch uber des babstes vetterliche fursthum stede zu Gobeune ader anderswo yn dem fursthum.

Und das der richter eyn teyl synt doctores yn dem keyser rechten ader geystlichen rechten, und were nutze, das eyn yckliche korefurste yn des konniges hoff mit synem solde eynen hilden, und der konnig so vil gotlicher Ritter ader mynner uf synen solt, so das sie dan uffenberlichen sweren solden, das sie keyn gift ader gabe nemen wolten von keyner parthyen.

Eyn iglicher korfurste, als der Sachsen spiegel yn der glosen¹ us wiset, heysset eyn palandes grefe, dar von er eyn korefurst ist. Eyn palandes grafe ist der der yn das gericht des konniges pallas gehort. Also ist eyn palandis grafe eyn richter des koniges palas. Also sollte billichen eyn iglich korfurste zu gerichte yn des konniges pallas

1) Zu Landr. III, 53.